



REPUBLIKA E SHQIPËRISË

**KOMISIONERI PËR TË DREJTËN E INFORMIMIT  
DHE MBROJTJEN E TË DHËNAVE PERSONALE  
DREJTORIA PËR MBROJTJEN E TË DHËNAVE PERSONALE**

Nr. 1618/prot.  
/3

Tiranë më 16.11.2018

**VENDIM**

Nr. 66, datë 16.11.2018

**MBI**

**ZBATIMIN E LIGJIT PËR MBROJTJEN E TË DHËNAVE PERSONALE**

Në mbështetje të neneve 29, 30 dhe 32 të Ligjit Nr. 9887 datë 10.03.2008 "*Për Mbrojtjen e të Dhënave Personale*", neneve 77-112 të Ligjit Nr. 44/2015 "*Kodi i Procedurave Administrative të Republikës së Shqipërisë*", si dhe provave të administruara në ngarkim të kontrolluesit "*Bashkia Lezhë*",

**KONSTATOVA SE:**

Në zbatim të Urdhrit Nr. 271 datë 30.10.2018 të Komisionerit për të Drejtën e Informimit dhe Mbrojtjen e të Dhënave Personale, u krye hetim administrativ pranë kontrolluesit "*Bashkia Lezhë*", me objekt:

- Verifikim i zbatimit të Rekomandimit Nr.11 datë 06.06.2016, Ligjit Nr. 9887 datë 10.03.2008 "*Për mbrojtjen e të dhënave personale*" dhe akteve të miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të kontrolluesit "*Bashkia Lezhë*".

Komisioneri për të Drejtën e Informimit dhe Mbrojtjen e të Dhënave Personale, pasi shqyrtoi relacionin e hetimit administrativ, procesverbalin e konstatimit dhe provat e administruara gjatë ushtrimit të hetimit pranë kontrolluesit "*Bashkia Lezhë*", konstaton se:

1. Kontrolluesi, nuk ka publikuar një rubrikë të veçantë "*politikat e privatësisë*", në zbatim të pikës së parë të Rekomandimit Nr. 11/2016 të Komisionerit. Konstatimi përbën shkelje administrative të nenit 18, pika 1, të Ligjit Nr.9887/2008 "*Për Mbrojtjen e të Dhënave Personale*": "*Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të*

*përpunohen të dhënat personale, për personin që do t'i përpunojë të dhënat, për mënyrën e përpunimit...".*

Informacioni i publikuar në *"Politikat e Privatësisë"*, duhet të ketë për qëllim informimin e subjekteve të të dhënave që vizitojnë këtë portal, mbi mënyrat e përpunimit të të dhënave, masat e sigurisë, ruajtjen e konfidencialitetit, të drejtat e subjekteve të të dhënave dhe detyrimet e kontrolluesit në kuadër të mbrojtjes së privatësisë.

2. Kontrolluesi *"Bashkia Lezhë"*, në zbatim të nenit 21 të ligjit, ka *"Njoftuar"* Zyrën e Komisionerit në lidhje me përpunimin e të dhënave personale duke përmbushur detyrimin e pikës së dytë të Rekomandimit Nr.11/2016 të Komisionerit, megjithatë konstatohet se ky *"Njoftim"* duhet përditësuar për shkak të ndryshimeve në kohë të kategorive të të dhënave, qëllimeve të përpunimit etj. Konstatimi përbën shkelje administrative të pikës 1 të nenit 21 dhe nenit 22 të Ligjit Nr. 9887/2008 *"Për mbrojtjen e të dhënave personale"*: *"...Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligji, të njoftuar më parë"*.

Përditësimi i njoftimit është një nga detyrimet më të rëndësishme ligjore i cili në vështrim të nenit 21 të ligjit, duhet të kryhet kur kërkohet ndryshimi i gjendjes së njoftimit të përpunimit, sipas nenit 22 të këtij ligji.

3. Kontrolluesi, nuk ka hartuar rregullore *"Për mbrojtjen, përpunimin, ruajtjen dhe sigurinë e të dhënave personale"*, në zbatim të pikës së tretë të Rekomandimit Nr.11/2016 të Komisionerit. Konstatimi përbën shkelje administrative të nenit 27 të Ligjit Nr.9887/2008 *"Për Mbrojtjen e të Dhënave Personale"*, pika 2/1: *"Kontrolluesi është i detyruar të dokumentojë masat tekniko-organizative të përshtatura dhe të zbatuara për garantimin e mbrojtjes së të dhënave personale, në përputhje me ligjin dhe rregullore të tjera."*

Duhet kuptuar drejt nga kontrolluesi rëndësia që ka hartimi i një rregulloreje të mirëfilltë për mbrojtjen e të dhënave personale, dhe përdorimi i saj nga nëpunësit e tij, si një akt bazë i cili ndërgjegjëson dhe detyron punonjësit për ruajtjen e konfidencialitetit, ruajtjen nga keqpërdorimi dhe mënyrën e administrimit të të dhënave personale.

Në përfundim të kontrollit administrativ, referuar provave dhe konstatimeve në vend, grupi i inspektimit ka hartuar procesverbalin e datës 01.11.2018, të cilin përfaqësuesi i kontrolluesit e ka nënshkruar me pretendimin: *"Do të merren masa nga Bashkia Lezhë që brenda 5 (pesë) ditëve të dërgohet informacion pranë Komisionerit"*.

Në zbatim të neneve 87-89 të Ligjit Nr. 44/2015 *"Kodi i Procedurave Administrative të Republikës së Shqipërisë"*, kontrolluesi *"Bashkia Lezhë"* është njoftuar të marrë pjesë në seancë dëgjimore pranë ambienteve të Zyrës së Komisionerit. Kontrolluesi ka dërguar informacion me shkrim më datë 05.11.2018. Kontrolluesi nuk është paraqitur në seancë,

si dhe nuk ka dokumentuar rikuperimin e shkeljeve sipas pretendimeve të parashtruara me shkrim.

Si përfundim, shkeljet e konstatuara gjatë ushtrimit të hetimit administrativ, në lidhje me mungesën e rregullores specifike "Për mbrojtjen, përpunimin, dhe ruajtjen e të dhënave personale" si dhe mospublikimit të rubrikës së veçantë "Politikat e Privatësisë" në kuptim të nenit 39, pika 1, gërmat "b" dhe "dh" të Ligjit Nr.9887 datë 10.03.2008 "Për Mbrojtjen e të Dhënave Personale", përbëjnë kundërvajtje administrative dhe sanksionohet me gjobë si më poshtë:

b) "Kontrolluesit që nuk përmbushin detyrimin për të informuar, të përcaktuar në nenin 18 të këtij ligji, dënohen me 10.000 deri në 300.000 lekë";

dh) "Kontrolluesit ose përpunuesit, që nuk marrin masat e sigurisë së të dhënave dhe nuk zbatojnë detyrimin për ruajtjen e konfidencialitetit, të përcaktuara përkatësisht në nenet 27 dhe 28 të këtij ligji, dënohen me nga 10.000 deri në 150.000 lekë".

Për zgjedhjen e masës së gjobës, Zyra e Komisionerit ka parasysh faktin se shkeljet e konstatuara janë serioze. Ato lidhen me garantimin e parimeve dhe përpunimin e ligjshëm të të dhënave.

#### **PËR KËTO ARSYE:**

Në zbatim të neneve 18, 27, 29, 30, 39 pika 1 gërmat "b" dhe "dh", si dhe nenet 40 dhe 41 të Ligjit Nr. 9887 datë 10.03.2008 "Për Mbrojtjen e të Dhënave Personale",

#### **V E N D O S A:**

1. Dënimin e kontrolluesit "Bashkia Lezhë", me gjobë në vlerën 50.000 (pesëdhjetëmijë) lekë për shkelje të detyrimeve të përcaktuar në nenin 18 të Ligjit Nr.9887/2008 "Për Mbrojtjen e të Dhënave Personale".
2. Dënimin e kontrolluesit "Bashkia Lezhë", me gjobë në vlerën 50.000 (pesëdhjetëmijë) lekë për shkelje të detyrimeve të përcaktuar në nenin 27 të Ligjit Nr.9887/2008 "Për Mbrojtjen e të Dhënave Personale".
3. Kontrolluesi "Bashkia Lezhë", në zbatim të nenit 18 të Ligjit Nr.9887/2008 "Për Mbrojtjen e të Dhënave Personale", të informojë subjektet e të dhënave mbi përpunimin e të dhënave personale, qëllimin e përpunimit, mjetet dhe mënyrat e përpunimit, përhapjen e të dhënave etj., nëpërmjet "Politikës së Privatësisë" në portalin zyrtar <http://www.lezha.gov.al>.
4. Kontrolluesi "Bashkia Lezhë", në zbatim të neneve 21 dhe 22 të Ligjit Nr.9887/2008 "Për Mbrojtjen e të Dhënave Personale", të kryejë pranë Zyrës së Komisionerit përditësimin e "Njoftimit" në lidhje me kategoritë e subjekteve të të dhënave, kategoritë e të dhënave personale që përpunohen, qëllimet e përpunimit etj.



5. Kontrolluesi "Bashkia Lezhë", të respektojë kushtet dhe kriteret e përcaktuara në nenet 5 dhe 6 të Ligjit Nr.9887/2008 "Për Mbrojtjen e të Dhënave Personale" dhe Udhëzimin nr. 39/2013 të Komisionerit "Për përpunimin e të dhënave personale në regjistrat publikë" gjatë administrimit dhe publikimit të të dhënave personale që përmbajnë Vendimet e Këshillit Bashkiak, listat e personave që përfitojnë ndihmë ekonomike, listat e nxënësve që marrin bursë, listat e pagesave për personat me aftësi të kufizuar dhe shërbimet e tjera që iu ofrohen qytetarëve.
6. Kontrolluesi "Bashkia Lezhë", të kryejë të gjitha detyrimet që burojnë nga ligji dhe nga ky akt brenda një afati 30 ditor, duke vënë në dijeni Zyrën e Komisionerit për përmbushjen e tyre.
7. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij Vendimi. Me kalimin e afatit të ankimit, ky Vendim kthehet në titull ekzekutiv dhe ekzekutohet në mënyrë të detyrueshme nga Zyra e Përmbarimit.
8. Kundër këtij Vendimi mund të bëhet ankim në Gjykatën Administrative të Shkallës së Parë Tiranë, brenda 30 (tridhjetë) ditëve nga komunikimi i këtij Vendimi.

Ky vendim u shpall sot më 16.11.2018.

**KOMISIONERI**

**Besnik Dervishi**

